

Prèmi sus l'innovacion en politica linguistica Jan-Moreu

CONTÈXTE :

L'Ofici public de la lenga occitana qu'ei un Gropament d'Interès Public qu'associa l'Estat e las Regions Aquitània Lemosin Peitau Charantas e Lengadòc Rosselhon Mièidia Pirenèus pr'amor d'ahortir la cooperacion e las accions ligadas a la transmission e a l'usatge de l'occitan.

Que desira uei desvolopar las iniciativas dens lo maine de l'innovacion en matèria de politica linguistica en suscitar vocacions.

ARTICLE 1 : l'organizator (qui)

L'Ofici Public de la Lenga Occitana qu'organiza lo Prèmi Jan-Moreu sus l'innovacion en matèria de politica linguistica, tanben aperat Prèmi dens las presentas.

ARTICLE 2 : objècte deu concors (qué)

Lo Prèmi Jan-Moreu que rescompensa un projècte exemplar e innovant entà accions o produits qui participan au desvolopament de la transmission e a l'usatge o socializacion de la lenga occitana. Que s'ageish d'ua rescompensa per un projècte qui contribueish de façon originau e eficaça a desvolopar lo nombre de locutors actius de l'occitan. Per locutor actiu que s'enten : persona en capacitat de parlar un occitan de qualitat e qui l'utiliza de façon regulara e e'u transmet.

Aqueth Prèmi qu'ei annau.

Se la qualitat deus projèctes ac permet, un projècte que serà premiat. Lo projècte laureat, que demora la proprietat deu son inventaire.

ARTICLE 3 : la participacion (entà qui)

La participacion a aqueth Prèmi qu'ei gratuita e qu'ei ubèrta a las personas moraus de dret public o privat (collectivitats territoriaus, enterpresas, associacions...) atau com a las personas fisicas de mèi de 18 ans.

Lo Prèmi qu'ei tanben ubèrt aus liceans e aprentís de las acadèmias de Bordèu, Lemòtges, Montpelhièr, Peitius e Tolosa shens condicion d'atge, degudament abilitats, per çò de las personas minoras, peus sons representants legaus.

Las candidaturas gropadas que son autorizadas. Totun, lo grop laureat que deverà designar un capdavant (persona fisica, establiment / estructura) qui serà lo sol a recéber la dotacion.

ARTICLE 4 : candidaturas e causidas deus laureats (com)

Ua jurada (cf. Article 7) qu'ei cargada de seleccionar lo laureat segon los critèris qui segueishen :

- l'originalitat deu projècte

- la pertinéncia e lo son impacte sus la populacion deus territòris concernits
- la soa facilitat de mesa en òbra.

Deu sol hèit de la lor participacion, los candidats que garanteishen los organizators e la jurada, contra tot recors eventuai de tèrces per çò que tòca lo projècte presentat. Cada candidat que pòt prepausar sonque un projècte, qui non pòt pas beneficiar d'un sostien financèr mei de la part de l'Ofici Public de la Lenga Occitana la medisha annada que la de presentacion au Prèmi.

La candidatura que's harà sus la forma d'un dossièr (presentacion liura) e que presentarà los elements que segueishen :

- ua letra d'engatjament signada se s'escad per la persona fisica (o lo son representant legau s'es minora) o peu representant legau de la persona morau candidata;
- ua ficha qui descriu de manèra detalhada la personalitat morau portaira deu projècte (se s'escad) e las soas coordenadas;
- ua ficha qu'indica las coordenadas postaus, telefonicas e mail per las personas fisicas;
- per las candidaturas gropadas, las pèças cap-sus mençonadas tà l'ensemble deus membres deu grop; lo cap de hialat deu estar plan clarament indentificat per l'ensemble deus membres deu grop;
- un descriptiu precís deu projècte, qui precisa notadament los objectius atenuts en tèrme de desvolopament de la transmission e de l'usatge de l'occitan;
- un budgèt previsionau deu projècte (en despendas e receptas);
- un rib.

ARTICLE 5 : dotacion (quina soma)

Lo laureat que beneficiarà d'ua dotacion d'un montan maximau de 5 000 €.

Lo montan de la dotacion versada au laureat que serà definida en foncion deu còst deu projècte peu Conselh d'administracion de l'OPLO.

La soma atribuida que serà versada en dus còps segon las modalitats qui segueishen :

- ua avança de 80 % de la soma que serà versada a la demanda deu Laureat sus presentacion d'ua atestacion de començament deu projècte e d'un RIB de mensh de dus mes.
- Lo sòlde (20 %) serà versat au laureat sus presentacion deu projècte acabat e/o en foncionament en foncion de la natura deu projècte.

ARTICLE 6 : calandier (quan)

Lo dossièr que deu estar enviat abans lo 31 de julhet. Tot dossièr adreçat après aquera data non serà pas pres en consideracion. Cada candidat que receberà un acusat de recepcion.

Los organizators non saberén estar responsables de problèmas postaus qui poderén aparir pendent la durada deu concors.

ARTICLE 7 : jurada (per qui)

La jurada qu'ei compausada de representants de l'Ofici Public de la Lenga Occitana, atau com, se s'escad, sus proposicion deu Director, de representants de l'administracion deus sos membres e/o de personalitats qualificadas.

Ua evaluacion deus projèctes que serà remetuda per la jurada au Conselh d'administracion de l'Ofici Public de la Lenga Occitana, qui deliberarà suu laureat deu Prèmi atau com suu montan finau de l'ajuda versada.

Aquera decision qu'ei shens apèu.

ARTICLE 8 : modificacion o anullacion deu Prèmi

Los organizators que's resèrvan a tot moment lo dret de modificar o d'anullar lo present Prèmi. La lor responsabilitat non poderà estar engatjada d'aquèth hèit.

ARTICLE 9 : operacions de comunicacion

Lo Laureat (o se s'escad lo son gropament) qu'accèpta d'estar fotografiat e qu'autoriza l'utilizacion deu son imatge per l'Ofici Public de la Lenga Occitana dens totas las manifestacions promocionaus e de comunicacions ligadas au Prèmi. Que s'engatja tanben a participar, a la demanda de l'organizator, a tota manifestacion utila a la promocion deu Prèmi. Non poderà pretèner a nada remuneracion d'aqueste hèit.

Lo laureat qu'autoriza la reproduccion, la representacion e la comunicacion au public, dens tots los supòrts deus organizators, deu projècte presentat dens l'encastre deu Prèmi.

L'autorizacion qu'ei consentida a l'organizator per ua durada de 5 ans a comptar de la data de designacion deu laureat. Qu'exclueish tota expleitacion de caractèr commerciau, atau com tota nocion d'exclusivitat. En complement d'aquera autorizacion, lo candidat que demora donc totaument liure de l'usatge deu son projècte.

L'organizator que garanteish que l'imatge (sus fotòs, benda videò e aute supòrt) deu candidat non serà pas utilizat entà ua operacion dab ua mira comerciau.

Lo candidat retiengut que s'engatja a mentàver de faïçon explicita la participacion financièra de l'Ofici Public de la Lenga Occitana, atau com deus membres deu Gropament, sus totes los supòrts de comunicacion (dossier de premsa, cartons d'invitacion, programas, afichas) relatius a la mesa en òbra deu projècte, tanben a méter en evidéncia los logòs du Gropament e de sos membres sus aquèths supòrts.

ARTICLE 10 : interpretacion deu règlament deu present Prèmi e lititges

Tota contestacion o reclamacion relativa a aquèth Prèmi que deverà estar formulada per escrit e non poderà pas estar presa en consideracion au delà d'un mes a comptar de la data de clausura deu Prèmi. Non serà pas responut a nada demanda orau o telefonica per çò que pertòca l'interpretacion o l'aplicacion deu present règlament.

Tota interpretacion lititgiosa deu present règlament, atau com tots los cas non prevists que seràn arbitrats sobeiranament per l'organizator. Nat recors non serà pas admetut. Lo sol hèit de pausar la soa candidatura qu'implica l'acceptacion integrau e shens resèrva deu present règlament.

Aqueth règlament que serà adreçat a titol gratuit a tota persona o organizacion qui'n hè la demanda escriuta après de l'Ofici Public de la Lenga Occitana.

L'organizator que prenerà totas las mesuras necessàrias au respècte deu present règlament.

ARTICLE 11 : proteccion de la vida privada e de las dadas personaus

Las dadas personaus (e qui pertòcan las candidaturas qui arriban de personas fisicas) que son destinadas a l'organizator e qui son necessàrias entà la gestion deu Prèmi. Las coordenadas deus candidats que constitueishen dadas confidenciaus. Nada informacion personau non serà pas cedida a tèrces.

L'organizator que s'engatja a non pas jamei las divulgar. En aplicacion de l'article 27 de la lei informatica e libertats en data deu 6 de genèr de 1978, los candidats que dispausan d'un dret d'accès, de modificacion, de rectificacion e de supression de las dadas qui'us tòcan .

Tota demanda en aqueth sens que deu estar formulada a l'organizator.